



Mark Sway en acziun – il punct culminant da l'occurrènz da giubileum da Pro Infirmis.

MAD

Pro Infirmis fa festa, Sway chanta e Mili sauta

Giubileum da 75 onns

■ (cp) Il 2013 festivescha Pro Infirmis Grischun ses giubileum da 75 onns. La gronda party ha lieu ils 22 da settember en la Halla da la citad da Cuira. Il program porscha insatge per mintga gust e sco punct culminant in concert cun Marc Sway. Cun il concert da Marc Sway s'ademplescha Pro Infirmis Grischun gist sezza in giavisch d'anniversari. Ma era l'ulteriur program empermetta blera variaziun: girs cun oldtimers, prelecziuns en il stgir, ina show per uffants cun la clownessa Mili, in chantunet da giugar per ils pitschens ed in'ustaria da festa, per numnar mo in pèr purschidas. Il percurs da mobilitad creà aposta per l'occurrènz permetta als visitaders da sentir sez las restricziuns d'umans cun in impediment. E la band MiMeMu, che sa cumpona d'umans cun in impediment, sa preschenta sin la tribuna cun musica d'emprima qualitat.

Visita prominenta

Al talk da prominents davart il tema «impediment e mobilitad» sa participeschan tranter auter il cusseglier naziunal *Christian Lohr*, l'antieriura skiunza da cursa *Maria Walliser Anesini*, sia figlia *Siri Anesini*, il cusseglier da la citad *Tom Leibundgut* e la Miss Handicap 2012 *Celine van Till*. Ils salids uffizials per la giubilara Pro Infirmis portan il cusseglier guvernativ *Mario Cavigelli* (schef dal departament da construcziun, traffic e selvicultura), *Michael Fässler*, Mister Handicap 2012, e *Rita Roos Niedermann*, directura da Pro Infirmis Svizra.

L'occurrènz vegn moderada dad *Annina Campell* – la fatscha grischuna enconuschenta da l'emissiun da televisiun «SRF bi de Lüt». L'entrada è libra.

Davart Pro Infirmis

Pro Infirmis, in'uniun registrada cun sedia a Turitg, è la pli gronda organizaziun

spzialisada en Svizra per umans cun in impediment. L'organizaziun è politica-main independenta e confessionalmain neutrala. Pro Infirmis porscha u intermediar cussegliaziun ed agid; ella promova e sustegna servetschs d'agid per gidar sazez. L'organizaziun finanziescha sia lavur cun contribuiziuns dal maun public (contracts da prestaziun) sco era cun donaziuns e legats. En il chantun Grischun dispona Pro Infirmis da posts da cussegliaziun a Cuira, Samedan, Tavau e Glion. Ultra da la cussegliaziun sociala porscha ella ina cussegliaziun d'assistenza, accompagnament a chasa, agid finanziel direct ed in club da furmaziun per umans cun in impediment. Pro Infirmis Grischun occupa 22 collavuraturas e collavuratur.

Infurmaziuns detagliadas davart l'occurrènz da giubileum dals 22 da settember a Cuira: www.graubuenden.proinfirmis.ch